

नमो नमो निम्बान दंतनस्त
वंदन गणवर की सुवर्णास्वामिने नमः

२२ पुष्पचूलिका-उपाङ्गसूत्रम्

मंत्रांक

(एकादसमं उपाङ्गम्)

(मूलसूत्रम् + चंद्रसूरिविरचिता वृत्तिः)

अध्ययनाभि-१....१०

- मू. (१) जइ णं मंते समणेणं भगवता उक्खेवओ जाव दस अज्झयणा पन्नत्ता । तंजहा-
मू. (२) 'सिरि-हिरि-धिति-कितिओ बुद्धि लच्छी य होइ बोधव्या ।
इलादेवी सुरादेवी, रसदेवी गंधदेवी य ॥

बृ. चतुर्यवर्गोऽपि दशाध्ययनात्मकः श्रीश्रीधृत्तिकीर्तिबुद्धिलक्ष्मीइलादेवीसुरादेवीरस-
देवीगन्ध-देवीतिवक्तव्यताप्रतिबद्धाध्ययननामकः ।

मू. (३) जइ णं मंते समणेणं भगवता जाव तंजहा उक्खेवओ चउत्थस्स वग्गस्स पुष्पचूलानं
दस अज्झयणा पन्नत्ता । पढमस्स णं मंते उक्खेवओ, एवं खलु जंबू ! तेणं कालेणं २ रायगिहे
नगरे गुणसलिए चेइए सेणिए राया सामी समोसदे, परिसा निग्गया ।

तेणं कालेणं २ सिरिदेवी सोहम्मे कथे सिरिवडिंसए विमाणे सभाए सुहम्माए सिरिसि
सीहाणसणंसि चउहिं सामानियसाहस्सेहिं चउहिं महत्तरियाहिसपरिवाराहिं जहा बहुपुत्तिया
जाव नट्टविहिं उवदंसित्ता पडिगता । नवरं दारियाओ नत्थि । पुव्वभवपुच्छा ।

एवं खलु जंबू ! तेणं कालेणं २ रायगिहे नगरे गुणसलिए चेइए जियसत्तू राया । तत्थ णं
रायगिहे नगरे सुदंसनो नामं गाहावई परिवसति, अट्ठे । तस्स णं सुदंसनस्स गाहावइस्स पिया
नामं भारिया होत्था सोमाला । तस्स णं सुदंसनस्स गाहावइस्स धूया पियाए गाहावतिणीए अत्तिया
भूया नामं दारिया होत्था बुद्धा बुद्धकुमारु जुण्णा जुण्णकुमारी पडितपुत्तत्थणी वरग परिवज्जिया
यावि होत्था । तेणं कालेणं २ पासे अरहा पुरिसादाणीए जाव नवरयणीए, वण्णओ सो चेव,
परिसा निग्गया ।

तते णं सा भूया दारिया इमीसे कहाए लद्धडासमाणी हट्टतुट्ठा जेणेव अम्मापियरो तेणेव
उवा० २ एवं वदासी- एवं खलु अम्मताओ पासे अरहा पुरिसादानीए पुव्वानुपुव्वि वरमाणे
जाव देवगणपरिवुडे विहरति, तं इच्छामो णं अम्मयाओ तुब्बेहिं अब्भणुण्णाया समाणी पासस्स
अरहओ पुरिसादाणीयस्स पायवंदियागमित्तए । अहासुहं देवाणुप्पिया मा पडिबंधं । तते णं सा
भूया दारिया ण्हाया जाव सरीरा चेडीचक्कवालपरिकिण्णा साओ गिहाओ पडिनिक्खमति २
जेणेव बाहिरिया उवट्ठाणसाला तेणेव उवा० २ धम्मियं जाणप्पवरं दुरुद्धा ।

तते णं सा भूया दारिया निययपरिवारपरिवुडा रायगिहं नगरं मज्झं मज्झेणं निग्गच्छति २ जेणेव गुणसिलए चेइए तेणेव उवा० २ छत्तादीए तित्थकरातिसे पासति, धम्मियाओ जाणप्पवरा ओ पच्चोरुहिता चेडीवक्खवालपरिकिण्णा जेणेव पासे अरहा पुरिसादानीए तेणेव उवा० २ तिक्खुत्तो जाव पज्जुवासति । तते णं पासे अरहा पुरिसादानीए भूयाए दारियाए तीसे महइ० धम्मकहाए धम्मं० सोच्चा णिसम्म हव्व० वंदति २ एवं वदासी-सद्दहामि णं भंते निग्गंथं पावयणं जाव अज्झुवेमि णं भंते निग्गंथं पावयणंसे अहे तं तुल्ले वड्डं जं, नवरं देवाणप्पिय ! अम्मापियरो आपुच्छामि । तते णं अहं जाव पव्वइत्तए ।

अहासुहं देवाणुप्पिया ! तते णं सा भूया दारिया तमेव धम्मियं जाणप्पवरं जाव दुरुहति २ जेणेव रायगिहं नगरे तेणेव उवागता, रायगिहं नगरं मज्झं मज्झेणं जेणेव सए गिहं तेणेव उवागता, रहाओ पच्चोरुहिता जेणेव अम्मापितरो तेणेव उवागता, करतल० जहा जमाली आपुच्छति । अहासुहं देवाणुप्पिए ! तते णं से सुदंसणे गाहावई विउलं असनं ४ उवक्खडावेति, मित्तनाति आमंतंति २ जाव जिमियि भुत्तुत्तरकाले सूईभूते निक्खमणमाणिता कोडुंबिय पुरिसे सद्दावेति २ एवं वदासी-खिप्पामेव भो देवाणुप्पिया ! भूयादारियाए पुरिससहस्सवाहिणीयं सीयं उवड्डवेह २ जाव पच्चप्पिणह ।

तते णं ते जाव पच्चप्पिणंति । तते णं से सुदंसणे गाहावई भूयं दारियं ण्हायं जाव विभूसियसरीरं पुरिससहस्सवाहिणिं सीयं दुरुहति २ मित्तनाति० जाव रवेणं रायगिहं नगरं मज्झं मज्झेणं जेणेव गुणसिलए चेइए तेणेव उवागते, छत्ताईए तित्थयरातिसए पासति २ सीयं ठावेति २ भूयं दारियं सीयाओ पच्चोरुतेति २ ।

तते णं तं भूयं दारियं अम्मापियरो पुरतो काउं जेणेव पासे अरहहा पुरिसादानीए तेणेव उवागते, तिक्खुत्तो वंदति नमंसति २ एवं वदासी-एवं खलु देवाणुप्पिया ! भूया दारिया अहं एगा भूया इड्ढा, एस णं देवाणुप्पिया ! संसारभउब्बिग्गा भीया जाव देवाणुप्पियाणं अंतिए मुंडा जाव पव्वयाति २ तं एयं णं देवाणुप्पिया ! सिस्सिणिभिक्खं दलयति, पडिच्छंतु णं देवाणु० ! सिस्सिणीभिक्खं । अहासुहं देवाणु० ।

तते णं सा भूता दारिया पासेणं अरहा० एवं वुत्तासमाणी हड्डा उत्तरपुरच्छिर्मं सयमेव आभरणमल्लालंकारं उम्मुयइ, जहा देवानंदा पुप्फचूलाणं २ हत्थे धोवति, पादे धोवति एवं सीसं धोवति, मुहं धोवति, धणंगंतराईं धोवति, कक्खंतराईं धोवति, गुज्झंतराईं धोवति, जत्थ जत्थ वि य णं ठाणं वा सिज्जं वा निसिहियं वा चेतेति तत्थ तत्थ वि य णं पुव्वामेव पाणएणं अज्झुक्खेति ततो पच्छा ठाणं वा सिज्जं वा निसिहियं वा चेतेति ।

तते णं तातो पुप्फचूलातो अज्जातो भूयं अज्जं एवं वदासी-अहं णं देवाणुप्पिए समणीओ निग्गंथीओ इरियासमियाओ जाव गुत्तबंभचारिणीओ, नो खलु कप्पति अहं सरीरपाओसियाणं होत्तए, तुमं च णं देवाणुप्पिए सरीरपाओसीया अभिक्खणं २ हत्थे धोवसि जाव निसिहियं धेतेहि, तं णं तुमं देवाणुप्पिए एयस्स ठाणस्स आलोएहि ति, सेसं जहा सुभद्दाए जावपाडियक्कं उवस्सयं उवसंपज्जित्ता णं विहरति ।

तते णं सा भूता अज्जा अनाहट्टिया अनिवारिया सच्छंदमई अभिक्खणं २ हत्थे धोवति

जाव घेतेति । तते णं सा भूया अञ्जा बहुहिं चउत्थउड्डं बहुइं वासाइं सामन्नपरियाणं पाउणित्ता तरस ठाणस्स अनालोइयपडिक्कंता कालमासे कालं किञ्चा सोहम्मे कप्पे सिरिवडिंसए विमाणे उववायसभाए देवसयणिज्जंसि जाय तोगाहणाए सिरिदेविताए उववन्ना पंचविहाए पञ्जत्तीए भासामनपञ्जत्तीए पञ्जत्ता । एवं खलु गोयमा ! सिरिए देवीए एसा दिव्वा देविह्वी लद्धा पत्ता, ठिई एग पलिओवमं ।

सिरीणं भंते देवी जाव कहिं गच्छिहिति ? महाविदेहे वासे सिज्झिहिति । एवं खलु जंबू ! निखेवओ ! एवं तेमाणं वि नवण्हं भाणिण्णं, सरिसनाम्मा विमणा सोहम्मे कप्पे पुव्वभवे नगरवेइयपियमादीणं, अम्पणो य नामादी जहा संगहणीए, सब्बा पासस्स अंतिए निक्खंता । तातो पुष्पचूलानं सिस्सिणीयातो सरीरपाओसियाओ सब्बाओ अणंतरं चयं चइत्ता महाविदेहे वासे सिज्झिहिति ॥ (चउत्थो वग्गो सम्मतो)

वृ. तत्र श्री देवी सौधर्मकल्पोत्पन्ना भगवतो महावीरस्य नाट्यविधिं दारकविकुर्वणया प्रदर्श्य स्वस्थानं जगाम । प्राग्भवे राजगृहे सुदर्शनगृहपतेः प्रियाया भार्याया अङ्गजा भूतानाम्नी अभवत् । न केनापि परिणीता । पतितपुत्रस्तनी जाता । वैर परिवञ्जिया वरपितृप्रखेदिता भर्त्राऽपरिणीताऽभूत् । सुगमं सर्वं यावच्चतुर्थवर्गसमाप्तिः

अध्ययनानि-१...१० समाप्तानि

२ एकादशमं उपाङ्गम्-‘पुष्पचूलिका’ समाप्तम्

मुनि दीपरत्नसागरेण संशोधिता सम्पादिता पुष्पचूलिकाउपाङ्गसूत्रस्य
चन्द्रसूरिविरचिता टीका परिसमाप्ता ।
